



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KT 0024911 23
Sarajevo, 07.08.2025.godine

Na osnovu člana 35. stav 2. tačka e) i člana 216. stav 3. ZKP-u BiH donosim sljedeću:

NAREDBU
o nesprovođenju istrage

Neće se provoditi istraga protiv:

S.T., rođenog ..., državljanin Bosne i Hercegovine, s prebivalištem na adresi B.L. ... na osnovu krivične prijave „(...)“ od 21.12.2023. godine, podnesene putem službene e-mail adrese Tužilaštva BiH, i krivičnih prijava „(...)“ od 19.12.2023. godine, „(...)“ od 20.12.2023. godine i „(...)“ od 20.12.2023. godine, podnesenih putem Državne agencije za istrage i zaštitu BiH, jer ne postoje osnovi sumnje da je prijavljena osoba počinila krivično djelo.

Obrazloženje

Tužilaštvo BiH zaprimilo je putem službenog e-maila krivičnu prijavu od 21.12.2023. godine i putem Državne agencije za istrage i zaštitu BiH krivične prijave „(...)“ od 19.12.2023. godine, „(...)“ od 20.12.2023. godine i „(...)“ od 20.12.2023. godine, kojima se prijavljuje da je „(...)“ putem svog naloga na društvenoj mreži „Twitter“ javno negirao genocid na način da je u komunikaciji sa drugim korisnikom ostavio komentar neprimjerene sadržine.

Dana 2023. godine Tužilaštvo BiH zaprimilo je Izvještaj o preduzetim mjerama i radnjama Državne agencije za istrage i zaštitu BiH broj ... od 28.12.2023. godine o postupanju po krivičnim prijavama podnijetim na službeni e-mail Agencije. Iz Izvještaja proizilazi da su policijski službenici Agencije postupajući po prijavama od 19.12.2023. godine i 20.12.2023. godine, po njihovom prijemu, pristupili društvenoj mreži Twitter pri čemu se sporni komentari nisu mogli pronaći. Takođe, prilikom ulaska na link kao poveznicu sa spornim komentarom otvara se obavijest na kojoj se navodi da stranica ne postoji, pa se pretpostavilo da je sporni komentar izbrisan. Podnosilac Krivične prijave „(...)“ saslušan je u svojstvu svjedoka na Zapisnik Agencije broj ... od 27.12.2023. godine pri čemu je potvrdio podnošenje prijave, a nakon što je uočio da je prilikom razmjene informacija o izborima u R Srbiji korisnik Twitter naloga „(...)“ u svom komentaru pitao „da li hoćete i u Srbiji da napravite novu Srebrenicu, e pa neće moći“, na šta je korisnik naloga na istoj društvenoj mreži naziva „(...)“ odgovorio: „U Srebrenici smo trenirali za vas, spremite se“.

Postupajući po Naredbi Tužilaštva BiH od 25.10.2024. godine policijski službenici Državne agencije za istrage i zaštitu BiH pristupili su uviđaju Twitter naloga, „(...)“ o čemu su dostavili Izvještaj broj ... od 08.11.2024. godine. Prilikom uviđaja pronađen je „Twitter“ profil naziva „(...)“, ali je prilikom ulaska na navedeni nalog utvrđeno da se na istom nalazi obavijest da su objave zaštićene, te se ni tada, kao ni po Izvještaju od 8.12.2023. godine nisu uspjeli pronaći sporni komentari. Takođe prilikom ulaska na link na kojem se nalazio sporni komentar otvorila se obavijest da navedena stranica ne postoji, pa se pretpostavilo da je sporni komentar izbrisan. U krivičnim prijavama se kao datum postavljanja spornog komentara navodi 19.12.2023. godine.

Tužilaštvo BiH je putem Zamolnice za pružanje međunarodne pravne pomoći od 11.06.2025. godine od Ministarstva pravde SAD, Krivičnog Odjela, kancelarije za međunarodne odnose, tražilo da od kompanije „Twitter“, odnosno „X“. Inc sa sjedištem u San Francisku, pribavi i ovom Tužilaštvu dostavi sadržaj objave spornog komentara od 19.12.2023. godine.

Dopisom Ministarstva pravde BiH broj ... od 11.07.2025. godine Tužilaštvo BiH je obaviješteno od strane Ministarstva pravde SAD, Krivičnog Odjela, kancelarije za međunarodne odnose da isto nije moglo udovoljiti Zamolnici za međunarodnu pravnu pomoć ovog Tužilaštva jer se zbog velikog priliva zamolnica za pravnu pomoć prioritet daje zahtjevima od najveće važnosti kao što su oni koji uključuju terorizam, nasilne zločine, seksualnu eksploataciju djece itd., da stoga zahtjevaju kao posljedicu velike novčane gubitke ili bar indicije ozbiljnosti povrede, pri čemu smatraju da u Zamolnici nema dovoljno takvih pokazatelja (u Zamolnici je citirana sadržina spornog komentara), te da su stoga u nemogućnosti da udovolje zahtjevu i da će slučaj otvoren po ovom pitanju zatvoriti.

Dakle, kako u konkretnom slučaju nije bilo moguće izvršiti uviđaj na samom „Twitter“/“X“ nalogu pod nazivom „(...)“ i time i službeno zadokumentovati sporne objave jer usljed nemogućnosti uviđaja ni radnjom međunarodne pravne pomoći nije bilo moguće zadokumentovati sporni komentar, to je odlučeno kao u Dispozitivu ove Naredbe.

O nesprovođenju istrage, kao i o razlozima za donošenje Naredbe o nesprovođenju istrage, Tužilaštvo BiH će, shodno članu 216. stav 4. Zakona o krivičnom postupku BiH obavijestiti Državnu agenciju za istrage i zaštitu BiH i druge podnosiocima prijava, a drugi podnosioci, osim Agencije, imaju pravo podnošenja pritužbe Kabinetu glavnog tužioca u roku od osam (8) dana.

**TUŽILAC
TUŽILAŠTVA BIH**